

ԾԱՂԿԱԶԱՐԴԻ ՏՈՆԸ ԿԱԼԿԱԹԱՅԻ ՀԱՄԱՅՆՔՈՒՄ

Ապրիլի 9-ին՝ Ծաղկազարդի տոնի օրը, Ս. Պատարագ մատուցվեց Կալկաթայի Ս. Նազարեթ հայկական եկեղեցում: Պատարագիչն էր հնդկահայոց հոգևոր հովիվ և Մարդասիրական ճեմարանի կառավարիչ Հոգեշնորհ Ս. Օշական վրդ. Գյուլգյուլյանը: Սրբազան արարողության ընթացքում պատարագիչ Հայր Սուրբը հավուր պատշաճի քարոզ խոսեց՝ անդրադառնալով օրվա խորհրդին:

Օշական վարդապետն իր քարոզում ջերմորեն շնորհավորեց Մարդասիրական ճեմարանի բոլոր սաներին մանուկների օրհնության օրվա ուրախարար առիթով՝ մաղթելով, որ նրանք լինեն առողջ և խելացի՝ պատիվ բերելով իրենց Հայրենիքին ու եկեղեցուն:

«Հայր մեր»-ից առաջ կատարվեց անդաստան և մանուկների օրհնության կարգ, որի ընթացքում Մայր Աթոռ Ս. Էջմիածնի միաբան և Մարդասիրական ճեմարանի ադմինիստրատոր Տիգրան սրկ. Բաղումյանն ընթերցեց այս տոնի առիթով Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի՝ մանուկներին ուղղված օրհնության խոսքը:

Արարողությանը ներկա էին Կալկաթայի եկեղեցական խորհրդի անդամները, Մարդասիրական ճեմարանի սաները և կալկաթահայեր:

Ս. ՀԱՐՈՒԹՅԱՆ ՏՈՆԸ ԿԱԼԿԱԹԱՅԻ ՀԱՄԱՅՆՔՈՒՄ

Ապրիլի 15-ին Կալկաթայի Ս. Նազարեթ հայկական եկեղեցում մատուցվեց ճրագալույցի Ս. Պատարագ: Պատարագիչն էր հնդկահայոց հոգևոր հովիվ և Հայոց Մարդասիրական ճեմարանի կառավարիչ Հոգեշնորհ Ս. Օշական վրդ. Գյուլգյուլյանը: Օրվան պատշաճ սուրբգրային բոլոր ընթերցվածները կարդացին Մարդասիրական ճեմարանի սաները:

Ապրիլի 16-ին կրկին բազմամարդ էր Ս. Նազարեթ հայկական եկեղեցին: Փրկչի Ս. Հարության տոնին Ս. Պատարագ մատուցեց Ս. Օշական վրդ. Գյուլգյուլյանը: Հընթացս Սրբազան արարողության Հայր Սուրբը հավուր պատշաճի քարոզ խոսեց՝ անդրադառնալով Ս. Հարության խորհրդի նշանակությանը քրիստոնյայի կյանքում: Նա ջերմորեն շնորհավորեց բոլորին Ս. Հարության տոնի առիթով՝ մաղթելով, որ Քրիստոսի հարության լույսն ու հույսը միշտ ուղեկից լինի նրանց: Հասկանալի էր, որ այդ օրը բոլոր նրանք, ովքեր գտնվում էին եկեղեցում, Ս. Հաղորդություն ստացան:

Սրբազան արարողություններին ներկա էին ուրախալի այս առիթով Կալկաթա ժամանած Հնդկաստանի Հանրապետությունում ՀՀ դեսպանության կցորդ Արսյոմ Խաչատրյանը, Կալկաթայի եկեղեցական խորհրդի անդամները, հնդկահայեր և Մարդասիրական ճեմարանի սաները: